



# SLUŽBENE NOVINE TUZLANSKOG KANTONA

GODINA 19 • TUZLA, PETAK, 30. NOVEMBAR 2012. GODINE • IZDANJE NA BOSANSKOM JEZIKU • BROJ 13

904

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“ br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici od 29.11.2012. godine, donosi

## ZAKON O IZMJENAMA I DOPUNAMA ZAKONA O VISOKOM OBRAZOVANJU

### Član 1.

U Zakonu o visokom obrazovanju („Službene novine Tuzlanskog kantona“, br. 8/08, 11/09 i 12/09), u članu 13. u stavu (5) riječi „prenositi, ustanovljavati terete ili na drugi način njome raspolagati“ zamjenjuju se riječima „i opteretiti“.

### Član 2.

U članu 20. stav (2) mijenja se i glasi:

„(2) Komisija broji pet članova koji se biraju sa spiska domaćih i međunarodnih stručnjaka za ocjenjivanje i reviziju kvalitete, te davanje preporuka o akreditaciji visokoškolskih ustanova, odnosno njihovih studijskih programa koji je utvrđen u skladu sa članom 49. Okvirnog zakona“.

Iza stava (4) dodaje se novi stav (5), koji glasi:

„(5) Postupak rada Komisije propisuje se pravilnikom koji donosi Ministarstvo.“

### Član 3.

U članu 21 stav (1) mijenja se i glasi:

„(1) Visokoškolska ustanova može početi raditi i obavljati djelatnosti visokog obrazovanja ukoliko se u postupku iz člana 20. utvrdi ispunjenost Standarda visokog obrazovanja i normativa („Službene novine Tuzlanskog kantona“, br. 8/06 i 9/08).“

Iza stava (1) dodaje se novi stav (2), koji glasi:

„(2) Standarde visokog obrazovanja i normative donosi Vlada Kantona, uzimajući u obzir Preporuke o kriterijima za licenciranje visokoškolskih ustanova i studijskih programa u Bosni i Hercegovini, te Preporuke o kriterijima i standardima ministarstvu Republike Srpske, kantonalnim ministarstvima i Brčko Distriktu BiH za osnivanje i zatvaranje visokoškolskih ustanova te za prestrukturiranje studijskih programa, koje donosi Agencija za razvoj visokog obrazovanja i osiguranje kvalitete (u daljem tekstu: Agencija) u skladu sa članom 48. Okvirnog zakona.“

Dosadašnji stavovi (2) i (3) postaju stavovi (3) i (4).

### Član 4.

U članu 24. iza stava (4) dodaje se novi stav (5), koji glasi:

„(5) Protiv rješenja iz stava (4) ovog člana ne može se izjaviti žalba ali se može pokrenuti upravni spor pred nadležnim sudom.“

Dosadašnji stav (5) postaje stav (6).

Iza stava (6) dodaje se novi stav (7), koji glasi:

„(7) Vlada Kantona jednom u dvije godine izvještava Skupštinu Kantona o ispunjenosti Standarda visokog obrazovanja i normativa u svim licenciranim visokoškolskim ustanovama u Kantonu.“

### Član 5.

Iza člana 27. dodaje se novi član 27a., koji glasi:

#### „Član 27a.

(Licenciranje studijskih programa)

(1) Licencirana visokoškolska ustanova može početi izvoditi studijski program nakon što ga licencira.

(2) Visokoškolska ustanova u postupku osnivanja mora zasebno licencirati svaki pojedinačni program koji namjerava izvoditi.

(3) Licenciranje vrši Ministarstvo, na zahtjev visokoškolske ustanove.

(4) U postupku licenciranja sudjeluje Komisija od najmanje tri stručnjaka koje imenuje Ministarstvo na zahtjev licencirane visokoškolske ustanove, koji su svi sa spiska domaćih i međunarodnih stručnjaka za ocjenjivanje i reviziju kvalitete, te davanje preporuka o akreditaciji visokoškolskih ustanova, odnosno njihovih studijskih programa koji je utvrđen u skladu sa članom 49. Okvirnog zakona i svi iz naučne oblasti iz koje je program predložen.

(5) Licenciranjem se provjerava akademski sadržaj, relevantnost ishoda učenja za tržište rada, te kapacitet licencirane visokoškolske ustanove da provede predloženi studijski program, u skladu sa Standardima visokog obrazovanja i normativima iz člana 21. ovog zakona.

(6) Pravilnike o postupku licenciranja donosi Ministarstvo, i to posebno pravilnik za licenciranje programa I. i II. ciklusa studija, a posebno pravilnik za licenciranje III. ciklusa (doktorskog) studija.“

### Član 6.

Naslov poglavlja „IV. LICENCA I AKREDITACIJA“ mijenja se i glasi: „IV. OSIGURANJE KVALITETE“.

### Član 7.

Član 28. mijenja se i glasi:

„(Oblici i načela osiguranja kvalitete)

(1) Osiguranje kvalitete u visokom obrazovanju u Kantonu obavlja se u skladu sa Standardima i smjernicama za osiguranje kvalitete u Evropskom prostoru visokog obrazovanja.

(2) Postupci osiguranja kvalitete obavljaju se na načelu vanjskog pregleda nezavisnih stručnjaka (peer-review).

(3) Postupci osiguranja kvalitete su licenciranje koje provodi Ministarstvo i akreditacija koju zajednički provode Ministarstvo i nezavisna agencija, na način da mišljenje o kvaliteti odnosno usklađenosti s kriterijima za akreditaciju daje nezavisna agencija bez uticaja Ministarstva i visokoškolske ustanove koja je predmet akreditacije.“

**Član 8.**

U članu 29. u stavu (2) riječ „akreditirani“ briše se.

U članu 29. stav (3) mijenja se i glasi:

„(3) Pravilnik o kriterijima i postupku licenciranja visokoškolske ustanove donosi Ministarstvo.“

**Član 9.**

U članu 30. stav (1) mijenja se i glasi:

„(1) Akreditacija je postupak provjere ispunjenosti standarda i kriterija na osnovu nezavisne vanjske procjene.“

Stav (2) mijenja se i glasi:

„(2) Kriterije za akreditaciju i norme kojima se određuju minimalni standardi u području visokog obrazovanja donosi Agencija u skladu sa članom 48. Okvirnog zakona.“

Iza stava (2) dodaje se novi stav (3), koji glasi:

„(3) Pravilnik o postupku akreditacije visokoškolskih ustanova donosi Ministarstvo.“

**Član 10.**

Član 31. mijenja se i glasi:

„(Obaveza i tipovi akreditacije)

(1) Sve visokoškolske ustanove u Kantonu obavezne su zatražiti akreditaciju visokoškolske ustanove (institucionalna akreditacija).

(2) Po dobijanju institucionalne akreditacije, sve visokoškolske ustanove dužne su zatražiti akreditaciju za svaki studijski program koji izvode u pojedinačnim postupcima, a prema planu koji zajednički utvrđuju s Ministarstvom i Agencijom.

(3) Visokoškolske ustanove koje ne dobiju akreditaciju visokoškolske ustanove prestaju s radom u skladu sa članom 26. ovog zakona.

(4) Visokoškolska ustanova prestaje upisivati studente na studijske programe za koje ne dobije akreditaciju, a studentima koji u trenutku nedobijanja akreditacije studiraju te programe omogućava se završetak studija.

(5) Visokoškolska ustanova može zatražiti ponovno dobijanje licence za studijski program za koji nije dobila akreditaciju prema članu 27a. ovog zakona najranije dvije godine nakon dobijanja negativne odluke o akreditaciji.“

**Član 11.**

U članu 32. stav (1) riječi „i licencirani“ brišu se.

U stavu (2) riječi „i licence“ brišu se.

**Član 12.**

Član 34. mijenja se i glasi:

„(Postupak akreditacije)

(1) Postupak akreditacije vodi Ministarstvo, a u njega je uključena Agencija u skladu sa članom 49. Okvirnog zakona.

(2) Postupak započinje podnošenjem zahtjeva visokoškolske ustanove.

(3) Ministarstvo zaprima zahtjev i prosljeđuje ga Agenciji koja organizuje eksterni pregled visokoškolske ustanove, odnosno studijskog programa i Ministarstvu daje preporuku o akreditaciji kojom utvrđuje jedan od sljedećih ishoda akreditacije:

a) rješenje o akreditaciji visokoškolske ustanove, odnosno studijskog programa;

b) rješenje o uslovnoj akreditaciji s rokom za otklanjanje nedostataka, s tim što po isteku roka odlučuje o zahtjevu nakon obavljenih provjera ispunjenosti nedostataka;

c) rješenje kojim se zahtjev odbija.

(4) Agencija je zadužena za eksterni pregled visokoškolskih ustanova.

(5) Nadležnost Ministarstva, kao nadležne obrazovne vlasti iz člana 49., stava (1), alineja 4. Okvirnog zakona da predlaže sastav stručne komisije, u cijelosti se prepušta Agenciji, u skladu sa smjernicom iz standarda 3.6. Standarda i smjernica za osiguranje kvalitete u Evropskom prostoru visokog obrazovanja.

(6) Ministarstvo na osnovu preporuke Agencije izdaje rješenje o akreditaciji, slijedeći u svemu preporuku Agencije.

(7) Primjerak rješenja dostavlja se Agenciji koja vrši ocjenu usklađenosti rješenja o akreditaciji s normama i kriterijima iz člana 48. Okvirnog zakona.

(8) Po ocjeni usklađenosti, Agencija vrši upis akreditacije u registar akreditiranih visokoškolskih ustanova, u skladu sa članom 49. Okvirnog zakona.

(9) Akreditacija se izdaje na rok od šest godina, nakon čega se provodi ponovna akreditacija.

(10) Zahtjev za ponovnu akreditaciju podnosi se najmanje šest mjeseci prije isteka akreditacije.

(11) Eksterni pregled može, na zahtjev visokoškolske ustanove i uz saglasnost Agencije, biti povjeren bilo kojoj agenciji koja je izlistana u Evropskom registru za osiguranje kvalitete (EQAR), ali eksterni pregled mora biti obavljen prema kriterijima i standardima iz člana 30. ovog zakona.“

**Član 13.**

Član 35. mijenja se i glasi:

„(Finansiranje licenciranja i akreditacije)

(1) Troškove licenciranja i akreditacije snose podnosioci zahtjeva za licenciranje, odnosno akreditaciju.

(2) Visinu troškova licenciranja, te visinu naknada za rad i troškova članova komisije za licenciranje utvrđuje Ministarstvo.

(3) Troškove licenciranja podnosilac zahtjeva uplaćuje Ministarstvu, koje od tih sredstava vrši isplate i podmirenje troškova.

(4) Troškove akreditacije svojim aktom utvrđuje Agencija.

(5) Troškovi akreditacije uplaćuju se Agenciji, u skladu sa članom 52. Okvirnog zakona, koja od tih sredstava vrši isplate i podmirenje troškova.“

**Član 14.**

Član 36. mijenja se i glasi:

„(Obaveze visokoškolske ustanove)

(1) Visokoškolske ustanove su najodgovornije za kvalitetu obrazovanja koje pružaju.

(2) Visokoškolske ustanove će organizovati svoj rad u skladu sa standardima iz prvog poglavlja Standarda i smjernica za osiguranje kvalitete u Evropskom prostoru visokog obrazovanja i prvog poglavlja Odluke o normama kojima se određuju minimalni standardi u području visokog obrazovanja u Bosni i Hercegovini („Službeni glasnik Bosne i Hercegovine“, broj 100/11).

(3) Visokoškolske ustanove su obavezne izraditi Samoevaluacijski izvještaj prema Kriterijima za akreditaciju i Odluci o normama kojima se određuju minimalni standardi u području visokog obrazovanja u Bosni i Hercegovini, te organizovati unutrašnji sistem kvalitete.“

**Član 15.**

Član 37. briše se.

**Član 16.**

Član 43. mijenja i glasi:

„(1) Ministarstvo vodi registar:

- visokoškolskih ustanova;
- studijskih programa sva tri ciklusa studija;
- ciklusa studija van sjedišta.

(2) Ministarstvo vodi evidenciju o nastavnicima, saradnicima i ostalim zaposlenicima u oblasti visokog obrazovanja.

(3) Sadržaj i način vođenja registra i evidencije propisuje ministar.

(4) Sve evidencije koje vodi Ministarstvo dostupne su na web stranici Ministarstva.“

**Član 17.**

U članu 50. stav (2) briše se.

**Član 18.**

U članu 51. u stavu (1) tačka a) mijenja se i glasi:

„a) daje prethodnu saglasnost na listu kandidata za izbor rektora i mišljenje o statutu visokoškolske ustanove i donosi opšte akte u skladu sa zakonom i statutom visokoškolske ustanove,

U istom stavu dodaju se nove tačke l) i m), koje glase:

„l) rješava po prigovoru na odluku o prijemu u radni odnos nenastavnog osoblja kao i izabranih asistenata koji prvi put zasnivaju radni odnos na visokoškolskoj ustanovi,

m) donosi pravilnik o unutrašnjoj organizaciji i sistematizaciji radnih mjesta i pravilnik o platama i drugim naknadama zaposlenika, uz prethodnu saglasnost Vlade Kantona.“

Dosadašnja tačka l) postaje tačka n).

#### Član 19.

U članu 58. stav (4) mijenja se i glasi:

„(4) Izuzetno od stava (1) ovog člana, rektor, prorektori i dekan su članovi senata po funkciji“.

Iza stava (4) dodaje se novi stav (5), koji glasi:

„(5) Lice koje je kandidat za funkciju rektora ili prorektora ne može učestvovati u radu senata na kojem se vrši izbor rektora, niti može glasati kada je u pitanju izbor rektora i prorektora.“

#### Član 20.

U članu 68. stav (1) mijenja se i glasi:

„(1) Naučno-nastavno, odnosno umjetničko-nastavno vijeće javne visokoškolske ustanove je akademsko tijelo fakulteta/akademije i čine ga svi nastavnici i određen broj saradnika matičnih fakulteta/akademija koji su u radnom odnosu u visokoškolskoj ustanovi sa punim radnim vremenom, kao i nastavnici nematičnih naučnih oblasti/predmeta koji su u radnom odnosu u visokoškolskoj ustanovi sa punim radnim vremenom, a koji ostvaruju normu na tom fakultetu/akademiji u oba semestra i predstavnici studenata izabrani od strane studentskog predstavničkog organa.“

Iza stava (2) dodaju se novi stavovi (3), (4), (5) i (6), koji glase:

„(3) Nastavnici koji su u radnom odnosu na javnoj visokoškolskoj ustanovi sa nepunim radnim vremenom, mogu učestvovati u radu naučno-nastavnog odnosno umjetničko-nastavnog vijeća na način utvrđen statutom.

(4) Minimalan broj članova naučno-nastavnog i umjetničko-nastavnog vijeća kao i broj saradnika i studenata iz stava (1) ovog člana utvrđuje se statutom.

(5) Dekan i prodekani su članovi naučno-nastavnog odnosno umjetničko-nastavnog vijeća po funkciji.

(6) Na fakultetima/akademiji koji nemaju minimalan broj članova naučno-nastavnog odnosno umjetničko-nastavnog vijeća, način povećanja broja članova se propisuje statutom.“

Stav (3) postaje stav (7) i mijenja se i glasi:

„(7) Lice koje je kandidat za dekana, odnosno prodekana fakulteta/akademije ne može učestvovati u radu naučno-nastavnog odnosno umjetničko-nastavnog vijeća na kome se vrši izbor dekana, odnosno prodekana, niti može glasati za tu poziciju.“

#### Član 21.

U članu 74. iza stava (1) dodaje se novi stav (2), koji glasi:

„(2) Visokoškolska ustanova, bez raspisivanja javnog konkursa, može angažovati nastavnika, višeg asistenta ili asistenta sa druge visokoškolske ustanove za realizaciju nastavno-naučnog procesa, bez zasnivanja radnog odnosa:

a) ako se na raspisani javni konkurs za izbor u zvanje, odnosno za popunu upražnjenog radnog mjesta, ne izvrši izbor u zvanje, odnosno popuna upražnjenog radnog mjesta,

b) radi zamjene nastavnika, višeg asistenta ili asistenta kome je prestao radni odnos na visokoškolskoj ustanovi ili je privremeno spriječen za rad, i to samo dok se u konkursnoj proceduri ne izabere novi član akademskog osoblja.“

Dosadašnji stavovi (2), (3), (4) i (5) postaju stavovi (3), (4), (5) i (6).

#### Član 22.

U članu 76. stav (1) mijenja se i glasi:

„Senat visokoškolske ustanove sačinjava registar domaćih publikacija naučnih radova i rezultata umjetničkog stvaralaštva koji su relevantni za izbor u naučno-nastavna i umjetničko-nastavna zvanja.“

#### Član 23.

U članu 78. dodaju se novi stavovi (2) i (3), koji glase:

„(2) Pod pokazanom nastavničkom sposobnošću iz stava (1) tačka c) ovog člana podrazumijeva se iskustvo u nastavnom radu na visokoškolskoj ustanovi.

(3) Kandidat koji prije izbora u zvanje docenta nema iskustvo u nastavnom radu u visokoškolskoj ustanovi, može biti izabran u zvanje docenta ukoliko pored ostalih uslova propisanih za izbor u zvanje docenta, ispunjava i uslove za izbor u zvanje asistenta i višeg asistenta.“

#### Član 24.

U članu 81. dodaje se novi stav (2), koji glasi:

„(2) Kandidat koji konkuriše u javnu visokoškolsku ustanovu za izbor u umjetničko-nastavno i umjetničko zvanje iz članova 79. i 81. ovog zakona, a nije zaposlenik iste, prilaže dokaz o javno predstavljenim oblicima umjetničkog stvaralaštva u kojoj se bira.“

#### Član 25.

Član 81a. briše se.

#### Član 26.

U članu 84. iza stava (1) dodaje se novi stav (2), koji glasi:

„(2) Izuzetno od odredaba stava (1) ovog člana, radni odnos može se zasnovati na određeno vrijeme bez raspisivanja konkursa/oglasa u slučajevima:

- neophodne zamjene iznenadnog odsutnog zaposlenika do 90 dana, bez mogućnosti ponovnog angažovanja na isti period, i
- zapošljavanja lica po javnom pozivu Federalnog zavoda za zapošljavanje, odnosno Kantonalne službe za zapošljavanje, za učešće u programu finansiranja zapošljavanja nezaposlenih lica iz kojih se izuzima prijem nastavnog osoblja visokoškolske ustanove.“

Dosadašnji stav (2) postaje stav (3).

#### Član 27.

U članu 85. stav (1) mijenja se i glasi:

„(1) Ugovori o radu nastavnika odnosno saradnika a drugim pravnim licima izvan matične ustanove zaposlenja mogu se ograničiti ili usloviti ako se radi o ugovorima koji bi negativno uticali na rad visokoškolske ustanove.“

#### Član 28.

Član 104. mijenja se i glasi:

„(1) Status studenta prestaje:

- okončanjem ciklusa studija,
- ispisom sa visokoškolske ustanove,
- isključenjem sa visokoškolske ustanove po postupku i uz uslove utvrđene zakonom, statutom ili drugim opštim aktom visokoškolske ustanove,
- kada student ne upiše narednu godinu studija, ne obnovi upis u istu godinu u propisanom roku, a ne miruju mu prava i obaveze studenta,
- u drugim slučajevima propisanim zakonom, statutom ili opštim aktom visokoškolske ustanove.

(2) Status redovnog studenta prestaje kada redovni student dva puta obnovi istu studijsku godinu i ne stekne uslove za upis u višu godinu studija.

(3) Lice koje je izgubilo status redovnog studenta iz razloga utvrđenog u stavu (2) ovog člana, može na zahtjev nastaviti započeti studij u statusu redovnog studenta koji se sam finansira.

(4) Status stečen u skladu sa stavom (3) ovog člana, može se mijenjati najviše dva puta do okončanja ciklusa studija.

(5) Izuzetno, lice koje u skladu sa odredbama stava (3) ovog člana nastavi započeti studij u akdemskoj 2012/2013. godini plaća upisninu i 50% školarine po upisanom semestru.“

#### Član 29.

U članu 124. u stavu (4) umjesto tačke stavlja se zarez i dodaju riječi: „izuzev studenta iz člana 104. stav (3) ovog zakona.“

**Član 30.**

U članu 125. u stavu (3) umjesto tačke stavlja se zarez i dodaju riječi: „s tim da se prilikom prve obnove godine vraća u status studenta koji se sam finansira.“

Iza stava (4) dodaju se novi stavovi (5) i (6), koji glase:

„(5) Student iz stava (3) ovog člana ponovo stiče status studenta koji se finansira iz budžeta Kantona ako u narednoj upisanoj akademskoj godini ostvari uslov za upis u narednu godinu.

(6) Odredbe stava (5) ovog člana primjenjuju se od akademske 2013/2014. godine i odnose se na studente upisane od te akademske godine.“

**Član 31.**

Iza člana 125. dodaje se novi član 125a., koji glasi:

„Član 125a.

(1) Student završne godine studija, koji je ovjerio posljednji semestar (apsolvent) zadržava status studenta do roka utvrđenog statutom, u kojem periodu ima pravo na obavljanje preostalih završnih ispita, u svakom kalendarskom mjesecu.

(2) Ukoliko student ne diplomira u roku iz stava (1) ovog člana, preostale obaveze izvršava kao student imatrikulant.

(3) Po isteku apsolvenskog staža student ima pravo na polaganje ispita uz naknadu čiju visinu utvrđuje upravni odbor.“

**Član 32.**

Član 144. mijenja se i glasi:

„Inspekcijski nadzor nad radom visokoškolskih ustanova vrši nadležna inspekcija za obrazovanje.“

**Član 33.**

U članu 151. u stavu (7) tekst „zaključno sa 30.09.2011. godine“ zamjenjuje se tekstom koji glasi: „do kraja akademske 2012/2013. godine“ i tekst „30.09.2015. godine“ zamjenjuje se tekstom koji glasi: „kraja akademske 2016/2017. godine“.

**Član 34.**

U članu 152. u stavu (1) tekst „31.12.2012. godine“ zamjenjuje se tekstom koji glasi: „kraja akademske 2013/2014. godine.“

**Član 35.**

Visokoškolske ustanove su dužne uskladiti svoje opšte akte sa odredbama ovog zakona u roku od 60 dana od dana stupanja na snagu ovog zakona.

Ministarstvo će u roku od šest mjeseci od dana stupanja na snagu ovog zakona donijeti:

a) Pravilnike iz članova 20., 27a. i 29. zakona,

b) Pravilnik o kriterijima i postupku akreditacije iz člana 30. zakona.

**Član 36.**

Odredba člana 104. stav (3) zakona primjenjivat će se i na studente koji su u akademskoj 2011/2012. godini izgubili status redovnog studenta, ukoliko u roku od osam dana od dana stupanja na snagu ovog zakona podnesu zahtjev za nastavak započetog studija.

**Član 37.**

Ovaj zakon stupa na snagu osmog dana od dana objavljivanja u „Službenim novinama Tuzlanskog kantona“.

Bosna i Hercegovina  
- Federacija Bosne i Hercegovine -  
Tuzlanski kanton  
Skupština  
Broj: 01-02-282-24/12  
Tuzla, 29.11.2012. godine

Predsjednik  
Skupštine Tuzlanskog kantona  
Slađan Ilić